

Zurichgow, & Basiliensis Provincia.

Regio.
Soli fertilitas.

Urbs Tigurum.

Tugium Pagus.
Situs.

Soli fertilitas.
Imperium majorem.

DE Helvetia generatim dixi, sequuntur Partes. Has Mercator tribus Tabulis sequentibus graphice delineatas exhibet. In prima, Provinciæ duæ, eæ quæ vernacule *Zurichgow*, & *Basiliensis*; in secunda *Wislisburgergow*; & in tertia *Argow* proponitur, quarum descriptiones una cum Lacus Lemani Chorographia, ordine dabo. Ad priorem Provinciam quæ prima Tabula depingitur quod attinet, ea *Zurichgow* vernacule, *Tigurinus pagus* Cæsari dicitur. Solum hujus tractus & potissimum per circuitum *Tiguri* civitatis primariæ est valde fecundum, feraxque Vini & Frumenti plurimi. Vinum tamen plerumque est subacerbum, nec potest ob vicinas Alpes ad perfectam pervenire maturitatem. Maturescit autem Vinum, seu potius mitescit a sua austeritate post aliquot annos in penu conservatum. Urbs hujus Provinciæ primaria Latinis *Tigurum*, proximis aliquot seculis *Thuregum*, dicta, vernacule *Zurich*. Vetustissima est Urbs, sita loco amœno ad exitum Lacus magni qui hic definit, excluditque amnem *Lindmagum* vulgo *Linemat* dictum, quem haud procul Glarona recipit, & dividit Urbem in duas Civitates majorem & minorem, quæ tamen tribus conjunguntur amœnis pontibus, in quibus frequentes Civium fiunt deambulationes. Forum habet frumentarium amplissimum, in quo ingens Frumenti vis hebdomadatim divenditur. Incredibilem Piscium copiam Lacus Tigurinus huic Urbi suppeditat. Forum annonæ illic locuples est, lacus subvectioni idoneus. Etsi autem Tigurum quinto demum loco Helvetico foederi accesserit, nihilo tamen minus propter Urbis celebritatem & potentiam princeps locus omnium consensu illi datus est, quem hodie quoque aucto foedere retinet in Comitibus, Legationibus, aliisque publicis actionibus. Viros illustres & claros multos habuit: *Conradum Pellicanum* linguæ Hebrææ, Chaldææ & Thalmudicæ peritissimum: *Theodorum Bibliandrum*: *Conradum Gesnerum* Polyhistora illum *Ἰωάννης Τάττος*, ac multos alios egregios viros. *Tigurinus* Pagus habet extra urbem Præfecturas *Majores & Minores*. *Majores* sunt *ix*, *Kyburg* Comitatus: *Groeningensis* Præfectura: *Andelfingen*: *Grifensee*: *Eglisow*; *Libera Provincia*: *Regensberg*: *Vadisvillana*, *Wadischwyl*: *Lauffa* ad cataraclas Rheni, *Lauffen*. *Minores* *xxii*. *Vindorum*, *Winterhur* & *Steina* Opida Tigurinis parent, proprios tamen Magistratus habent, sed Tigurinorum edictis tenentur & in bello illis militant, propriis tamen signis utentes. Ad censetur huic Provinciæ Tugium pagus, *Tugium*, vulgo *Zug*, Opidum, ejusdemque nominis Regio, versus Septentrionem, Suitiam vicinitate attingens in pede pascui, & vitibus confiti Montis lacui piscoso adjacet, cui a Civitate nomen *Lacus Tugium*, qui Meridiem versus ad Artense Opidum extenditur. Agrum compascuum, Vini Frumentique feracem habet. Ejus cultores *Tugini*, Straboni vero lib. vii *Togyni* dicuntur, qui cum Tigurinibus & Cimbris inito foedere, Romanis se opposuere. Consulendi Plutarchus in vita Marii & Eutropius lib. v. Paruit Tugium aliquando nobilibus, postea in Austriorum potestatem pervenit: Hi, bello Helvetico, perpetuo præsidia illic aluere, quæ Suitios & Tigurinos infestabant. Itaque anno M ccc l i i Tigurini cum quatuor aliis pagis expeditionem adversus Tugium susceperunt. Præsidarii, munitionibus Opidi diffidentes, ante adventum Helvetiorum id deseruere, Cives tamen, qui fidem Austriis servare vellent, obsidionem per dies xv sustinuerunt. Tandem deditionem fecere,